

## TAITOSI Poru Gigirum Meuma Taitosi Menan Tenewa

<sup>1</sup> Poru, God nauwawa eniwa, sira Iesu Keriso apasoro meuma, God gomiya munne igiyawa anotumat muma oya sira anoano natawa me God namive oraiwa oya, me anegne apasoro ana. <sup>2</sup> ✧ God me oma den ane uga wape. Me watawit ampa di inainai yaibobot oya agi wane. Me nu anoetewa gumbe God wagomiya nedne. <sup>3</sup> Me anonewa kumive, gae mame toyau nunne. God me Waita Abnawa me nau mame atan oya didnedne.

<sup>4</sup> ✧ Ne utunwa Taitosi me anotumat desiroma aunewa gumbe. Mamunwa God ge nu Waita Abnawa numawa Keriso Iesu gumbe, God ano oraiwa ge yum ge gungap.

### *At Kurete Apa Taitosi Nau Aivi*

<sup>5</sup> Ne at Kurete apa kwegemna, kuiyawa me nau numawa onan den anewa ge yai waribiya sira ne genan wana mina, gwetoimu dada danave, ge namuyoiyoi igiyawa te muntan oya. <sup>6</sup> ✧ Namuyoiyoi abnawa me iyayapan pui den yuwameme, memawa vesin desirom, mamawa me usitainawa anotumat anoeme, sira usitainawa mu ano kukaeba mumawa oya pui den yuwameme sira mu nawankanu eme igiyawa onan. <sup>7</sup> Namuyoiyoi kokawa me God nauwawa aivi gumbe, me iyayapan pui den yuwamemewa. Me danawa piri den aigimpe, yoi yusi-pamitwa koka den naigimpe, mut atan den anoigimpe, anmagawa kukaeba gumbe den autan anoivi. <sup>8</sup> Megara baigan gumbe iyayapan warinamivi, me oraivit anoivi, me

---

✧ **1:2:** 1Ko 1:27   ✧ **1:4:** Rom 1:7; 2Ko 8:23; Gar 2:3   ✧ **1:6:** 1Ti 3:2-7;  
2Ti 2:24-26

mokona aigimpe, ano meuma me oraimina, me inaiinai oraimina God namive, ge membovit amaraivi. <sup>9</sup> Me gae natawa me toyau waneyawa yaigipamit amaraivi. Kuyawa gae oraiwa gumbé me watdega mumpe, sira yai mu wat dirumpe epin oraiwa.

<sup>10</sup> ☆ Kuyawa nu gunup anavi eme igiyawa, gae uga veme igiyawa, iyayapan mu ape iyayapan upeba anopipantum ape igiyawa, obiren wakeya. Mu kwapituitui igiyawa danowo obiren wakeya. <sup>11</sup> ☆ Mu nouwa tobotpe. Mu imuwo anmagawa kukaeba autan oya dividivi mu den toyau mumpewa dirumeme, sira gwe gwe upeba mu kukai muteme. <sup>12</sup> Propeta me at muma desirom meib wane, “Kurete igiyawa mu evedni ugauga vemewa sira mae kukaeba, sira nau atan den anoeme megara mu nakwai nabot nabot igiyawa.” <sup>13</sup> ☆ Gae mame natawa di. Meoya, yusipamit wag diruma, meve mu yaimoyai yang anope anotumat gumbé. <sup>14</sup> ☆ Ju igiyawa kuinuiyowa natawa onanwa den anope, sira natawa topaiemewa igiyawa gwangwan mumawa den anope. <sup>15</sup> Danowa iyakaisi igiyawa munan dividivi undag iyakaisi, megara kukaeba eme igiyawa munan ge den anotumat eme igiyawa munan, dividivi undag iyakaisi onan. Kuyowa ge nibdanowa me kukaine. <sup>16</sup> ☆ Mu veme God yang anotu, go mu aninin emewa mu God topai eme. Mu di kukaimusia, sira mu God noiwa den aueme, sira oma den ane dividivi undag oraivit atan oya.

## 2

### *God Toyau Toyau Meuma Gumbé Wakeg Aigimta*

---

☆ 1:10: 1Ti 4:7    ☆ 1:11: 2Ti 3:5-6; 1Pi 5:2    ☆ 1:13: 2Ti 4:2    ☆ 1:14: 1Ti 4:7    ☆ 1:16: 1Jn 1:6; 2:4

<sup>1</sup> Ge toyau toyau oraiwa gumbe gae diruma. <sup>2</sup> Iyai tayawa toyau muna. Mu mumbovit yaimoyai amarape, ayamareme igiyawa wakepe, sira mokona ag anotumat oraiwa ge baigan ge yaimoyai amaraigimtanwa gumbe baina wakepe.

<sup>3</sup> ☆Ebu desiroma, vesin tayawa gaibu toyau muna, mu God nauwawa eme, meoya mu God gumbe yaimoyai ape, yano den waigimpe, yoi yusipama kokavit den naigimpe, dividivi oraiwa toyau munigimpe. <sup>4</sup> Mu meib ape ipewa, vesin mataiwa oma ane toyau mumpe, memoutuwa ge usitainowa gumbo baigan atanwa, <sup>5</sup> ☆mokona atanwa, uinantaraki onanwa, gwe danave dividivi undag amaraigimtanwa, baigan gumbe wakeigimtanwa, memoutuwa nouwa autanwa. Meib toyau mumpe. Mu gumbo iyayapan God gaiyawa den yan yawampe.

<sup>6</sup> Gina desiroma, iyayapan mataiwa mu toyau muna, yaimoyai anog amaraigimpe. <sup>7</sup> ☆Sira dividivi undag gumbe ge oraiwa a, sira guwaguwawa oraiwa a. Ge toyau toyau geuma gumbe oraiwa ge ebnotu yaug anope. <sup>8</sup> ☆Gae oraiminawa me iyayapan pui den yupewa ge wa. Meib a ipewa, anavi numawa oma den ane gae kukaeba nu gunup wape, mu ubmam ape.

<sup>9</sup> ☆Ankwatave nau eme igiyawa diruma, dividivi undag gumbe kokawa muma nouwa aupe, yaug anope oma ape, sira kokawa muma gumbo gae garawa den dirumpe. <sup>10</sup> Sira diruma, ub mu gumbo den ape, natawa di wape. Me dividivi undag mu emewa gumbe God Waita Abnawa numawa toyau meuma ben waramtan oya.

<sup>11</sup> Kuyawa God ano oraiwa mu waita muniviwa iyayapan undag gumbo uwane. <sup>12</sup> ☆Me toyau nunnewa, God

---

☆ 2:3: 1Ti 3:11   ☆ 2:5: Epe 5:22   ☆ 2:7: 1Ti 4:12   ☆ 2:8: 1Pi 2:15  
 ☆ 2:9: 1Ti 6:1   ☆ 2:12: 1Jn 2:16

namive ebnotu onanwa ge piyu mame anoano meuma yankweta. Sira kum gare mokona gumbé, oravit gumbé, inainai oraiwa God namive gumbé wakeigimta. <sup>13</sup> Sira toyau nunnewa, nu owanowan me waribiya nunnewa amaraigimta. Me natawa meib. God kokawa ge Waita Abnawa numawa Keriso Iesu mu eyawa gumbé matai uwape. <sup>14</sup> ✧ Keriso me nunan boanewa me nu kukaeba numa oya sira gwiruwad nuntan oya, sira iyayapan meuma mu oraiwa atan oya anoemewa, me membovit oya wat muintan oya.

<sup>15</sup> ✧ Dividivi mame yusiwa kokavitwa gumbé toyau muna, wak diruma ape, sira pui yua. Mu den kwema, ge yan barau gempe.

### 3

<sup>1</sup> ✧ Iyayapan wak diruma, mu amara muniviwa ge yutuwa gaibu igiyawa nouwa aupe. Sira mu nouwa aug oraiwa undag atan anoeme igiyawa ape. <sup>2</sup> Sira gae kukaeba iyayapan gumbo den wape, sira mut den ape, yum gumbé wakepe, iyayapan undag gumbo baigan ape. Mu meib atan aigimpe igiyawa ape.

<sup>3</sup> ✧ Watavit nu warago igiyawa mina atu, nouwa den aug anopipantum eme igiyawa mina atu, sira dividivi ano kukaeba ge piyu degadega meuma gumbé ankwatave nau eme igiyawa atu. Danapiri ge anoano numawa me iyayapan upeba mu degadega atan den anoetewa danave wakeete, sira nu topai nuniya igiyawa, sira nu gara topai atu igiyawa. <sup>4</sup> Megara God waita abnawa numa nonemagawa oraiwa ge baigan iyayapan munan uwane. <sup>5</sup> ✧ Me kumiwa apa, waita nunne. Me divi da oraiwa nu atunewa onan,

---

✧ 2:14: Eks 19:5; Deu 7:6; Ejk 37:23; Gar 1:4; 1Pi 2:9 ✧ 2:15: 1Ti 4:12 ✧ 3:1: Rom 13:1-7; 1Pi 2:13-14 ✧ 3:3: 1Ko 6:9-11; Epe 2:1-2; 5:8 ✧ 3:5: 2Ti 1:9; Ibr 10:22

megara me ano oraiwa meuma oya. Guwawa Iyakaisiyapama gumbe, mataiwa yaitanwa gumbe, mataiwa atanwa gumbe muinne. <sup>6</sup> ✧ Iesu Keriso me Waita Abnawa numa gumbe, God Guwawa Iyakaisiyapama mame nunne gunup noidauwane. <sup>7</sup> Me Keriso ano oraiwa gumbe nu oraivit atanwa oya, sira inaiinai yaibobot oya anoetewa gumbe nu kwan autanwa igiyawa atan oya. <sup>8</sup> Gae mame me ano kokavitwa, meoya ne anoeniwa ge gae mame oya yusipamit diruma. Me God gumbe anotumat eme igiyawa mu dividivi oraiwa atan anotan oya. Dividivi mame me oraiwa, sira me iyayapan gumbo waita mumawa.

<sup>9</sup> ✧ Megara gae kukaeba, dam yaig onamiyawa, diguragut sira gwangwan gumbo gae gara wa atanwa yankweya. Me iyayapan gumbo waita muma onan, sira natawa onan. <sup>10</sup> ✧ Apan da dam meumawa ube ainampewa, koni desirom toyau wana, meve koni duwameba toyau wana, ivi ig aoreya aipe. <sup>11</sup> Ge yaug anoana apan meiba anokukam abnawa me membo yaug anone me kukaeba, megara kukaeba aigimpewa.

### *Gae Oieba*

<sup>12</sup> ✧ Ne Arutemas go Titikas tetna genan onampe. Me ivi, garawapa ge di nenan onaga. Ne Nikoporis apa waketna. Ne taig kumiwa me apa waketan anoeni. <sup>13</sup> ✧ Dividivi undag ake Gwangwan toewanewan Jenas go Aporos amdau ampe. Dividivi anoemewa ge tamibarip a. <sup>14</sup> ✧ Dividivi undag evedni anoetewa oya nau oraivit atanwa nu undag mina yaug anotanit di.

---

✧ 3:6: Apa 2:17-18    ✧ 3:9: 2Ti 2:14,16    ✧ 3:10: Mat 18:15-17  
 ✧ 3:12: 1Ko 4:7-8; Epe 6:21-22    ✧ 3:13: Apa 18:24; 1Ko 3:5-6    ✧ 3:14:  
 Epe 4:28

<sup>15</sup> Undag gunap wakeemewa genan gaun veme. Nu anotumat owanaiwa gumbo gaun numa wag diruma. God ano oraiwa ye undag guniyap wakeigimpe.

**GAE MATAIWA**  
**The New Testament in the Maiwa language of Papua New Guinea**  
**Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 8 Sep 2021 from source files dated 28 Aug 2021

45dcb14f-9541-5013-8907-63bcfabcd6b5